

52

中國名山勝蹟志叢刊
沈雲龍教授主編

普

陀

山

K928.3/42:3

(一)

海文
社版出

168802

中國名山勝蹟志叢刊第六輯
沈雲龍主編

普陀山志

秦耀曾編

文海出版社

有限公司
印行

重修南海普陀山志卷之十六

江蘇金陵

王鼎勳青甫參定

秦耀曾遠亭編輯

普濟寺住持能崙鴻崑校訂

國朝藝文

潮音和尚中興普濟寺記

雲間

王鴻緒

尚書

西方聖人之教雖不着一切色相而必以名山靈境莊嚴象設爲四衆起信皈住之因又必得眞參實證堪爲人天眼目者演法其間斯足以震耀中土補陀洛伽首四大名山爲普門大士示現應跡之地較之

清涼峩睂尤爲神異提唱大法龍象蹴踏代不乏人
宋紹興有了公眞歇元泰定有信公孚中明洪武有
聯公祖芳百數十年傳薪記荊證證相映曹溪一杓
水若以南海爲會歸祖席至四十二人獨聯公以後
自永樂至今三百五十六年間宗風闐寂無聞時則
中原濟上知識亦多韜光弗耀不獨所稱海濱孤絕
處也卽萬厯中神宗慈聖太后爲九蓮下生崇信三
寶龍宮法藏內府朱提之賜使命絡繹法門之興當
在此際而未聞有大乘導師悟徹單提直指者以應
帝釋之求而副輪王之命竹林瓔珞震旦雷音不得

不謂之中微掛漏也今潮公爲天童密祖四世法裔
眞參實詣諸方所推膺總戎藍公之請自慈水壽峯
卓錫茲山開示愚蒙敷揚微妙參學禪那雲趨霧集
三祖之後稱復盛焉又幸逢

聖天子布金龍藏增飾琳宮紺宇且頒賜

御書般若以寵耀之由是海中古刹向之奔突於鹿豕蔓
沒於荆榛者一變而爲鼓鐘鏗鏐金碧輝映之地而
吾潮公坐曲肱牀提柳標杖闡第一義諦示不二法
門不負古梵皇

今聖皇鄭重付囑之意是道則三祖之道時非紹興泰定

之時併非僅故明洪永之時也非超前代而獨盛者哉嘗曰大法之衰不在四衆而在狂禪多遊族姓修飾竿牘務爲求名而中茫焉無所了吾之所不敢出也故每喜於岑寂無人之境寄折足鐺與一輩直朴衲子負米肩柴葺敝補殘而晨夕間痛劖深錐懸崖撒手梯接賢愚其視風穴單丁船子舉棹不啻過之所以克振三祖之門庭而大衆信服也從末有不誠而能動人及成事者此在世間法且然而况續佛慧命光復正教也乎然則遊四大名山而指圖牒所傳種種諸大士靈蹟吾謂不如潮公之法言德行爲可

信也雲間去翁洲數百里順風一葦可航吾鄉耆宿
尊信師教者乞予一言誦揚中興之績予爲涉筆記
其梗概如此若夫青蓮可摘白社可期予尙得問渡
蛟門親金鑰而剖疑網豈非夙昔之大願也哉

增修南海普陀山志序

前人

補陀遷圯屢矣自潮音禪師卓錫因而大振余曾敘
之今潮音已爲古人矣而其徒珂月增修山志致書
於余欲更有所言余旣未登名山躬承妙相彼所謂
圓通之殿說法之場山川洞壑變現之所畧無一涉
何從而敘之若寄之於意擬想像之間謾爲立說則

亦何裨於精藍而冀其有當於大士哉珂月之言曰
前此寺工未竣志事匆卒今者崇宮峻宇畫棟雕楹
上摩青天而下瞰滄海鐘板六時食者萬指檀施訖
於重譯先和尚之勤可謂至矣且鉅費出自大盈寺
額標於

天藻是未可以言歟余悚然無地爲之握管然吾所言顧
珂師所未備者間嘗論自背好道之君有事於補陀
者皆有求於大士者也

聖天子在上無所不載無所不覆巍巍蕩蕩民無能名加
意于名山殷勤大士延見法席賜以

溫綸錫之

宸翰此亦事之偶然爲仁育所不遺無所爲而爲之者也
是役也紀事以實浮僞者隻字弗存出言以公阿比
者片詞勿立垂後行遠接物利生爲此山千古文獻
之徵是則皆可言也因敬書之簡端而答之

恭誦佛恩表

錢塘高士奇學士

伏以佛日瞳矐瑞氣映紫微之座卿雲糾縵榮光騰
碧落之輝三多備而頌溢堯衢聲諧梵唄九如獻而
歌賡周雅響答鐘魚宏宣鹿女之經金粟影中用酬
高厚頂禮龍華之懺玉毫光裏仰荷匡扶拜手颺言

齋心展懷伏爲

當今聖主四德乘乾六符保泰日華月朗兆醴泉甘露之
祥海晏河清萃赤雀黃魚之應畢箕風雨春秋補助
時行大小法廉宮府幾康其飭來王來享訖南梧北
柳之鄉移遂移郊沛商綱夏車之澤起瘡痍於西北
頻發帑金念杼柚於東南遞蠲井稅興隆闕里

聖心與洙水同源祀重泰壇

帝德其岱宗雙峙顯謨承烈功超書契以來摩義漸仁俗
躋羲炎以上猥因萬幾待理過煩宵旰之焦勞旋荷
三寶呈祥默佑寢興之康豫深宮侑食欣聞廣樂悠

揚正殿垂裳快覩

天容晬穆感佛恩之靡量數溢恒沙知

聖壽之無疆歷綿喬嶽普天戴日薄海同春士奇蘭署綴
員銅池末職厠足雲霄之上時隨豹尾以趨蹌承恩
密勿之中日覲

龍顏於咫尺惟昔躬依禁籞曾效呼嵩于今跡蹈邱園彌
懷獻曝念

主恩之稠疊祇切悚惶聞

聖體之冲和曷勝忭舞敬涓吉日虔集緇流碧海波澄洵
一塵之不染朱幢綵結儼千聖之式臨仗方便之法

門窗舒意葉叩莊嚴之妙相室度心香饌供伊蒲喜
聞禪板航乘般若衆聽潮音時則珠露灑灑金風拂
拂烏囀菴羅之樹音徹迦陵花盈畢鉢之林馨聞簷
蔔絳雲成蓋山中開舍利之城綠玉爲階海上現辟
支之果用祝

聖神寶祚綿歷千秋爰資日月香燈光昭萬劫伏願綏成
允錫保佑常申福備箕疇朱草蕃滋於玉祀慶流禹
甸黃星爛照於金鋪人間彌勒之碑永鐫靈瑞天上
崑崙之水咸戴恩波則微臣長諧燕喜之情而方區
羣洽鳧趨之願矣

敕建普濟禪寺記

前人

世當昇平之會時和人樂財阜用盈百度具舉自四民以至方外無不獲所白廬舍園廡以迄琳宮梵宇自都會郡邑以至山陬海澨僻遠之所無不整飭此其盛振古以來不數見也南海普陀寺爲觀音大士道場創於後梁貞明近八百年矣累朝勅建賜額不絕雖千萬里之外躡蛟鼉衝波濤函香至者趾相錯也曩因海氛未靖內徙僧衆寶地日就傾圯我

皇上威德誕敷八埏賓服澎湖臺灣盡歸版籍大弛海禁農桑商賈咸得樂業寺僧乃漸復其故二十八年春

翠華南巡遣使頒帑金千兩

特命重修維時總戎黃公大來繼以藍公理皆能奉

上德意崇信興創遠近縉紳士民亦各視其力來助而潮
音禪師宏闡宗風仔肩厥事於是殿堂樓閣祠宇軒
楹起頽葺壞稍稍就理寺故有大圓通殿爇於燹潮
公經營量度凡爲間七爲架十五高六丈二尺廣十
四丈縱八丈八尺甬道深四丈積三年始構成其大
畧寓書余曰公感夢一事最見靈異於茲山實有緣
焉殿工之興俟助尤力敢以記請余諾之未及屬稿
而潮公示寂歲己卯三月

車駕再至浙省

宸翰題普濟羣靈四大字復發帑金千兩遣官賫賜兼御用念珠等物以爲永鎮余惟

聖德汪濊無遠不浹而十年之間再頒內帑俾鹿苑雁剎丹雘煥然稽天浴日之區梵唱祝釐與內地州邑相響答國家之昇平厯服之綿遠人風之和樂胥於是乎見之而諸公之疎財樂善潮公之志大力勤皆可書也爰操筆而爲之記

大圓通殿記

前人

普陀之獨建圓通大殿者何義也普門權位菩薩於

楞嚴會上文殊特揀圓通而此山又爲圓通大士親
指法址故知供一圓通而二十四圓通無不在是矣
供一權位菩薩而過現未來之一切善逝法身報身
應身無不在是矣此普陀大寺獨建圓通大殿之義
也然必爲之記者何居此山闢白南梁其始爲不冝
去觀音院於宋爲敕賜寶陀觀音寺於明爲敕建護
國永壽普陀禪寺皆有名公碩彥詳記其事垂諸碑
乘我

國家定鼎以來四海賓服八荒嚮風際我

皇上聖神天縱化理日新一游一豫率土蒙休二十八年

春

聖駕南巡

欽賜帑金重新紺宇經營者主席潮公外護者總戎藍公
傾囊委粒者十方檀信三年而殿工落成潮公又復
出單告募招山左陶客冶琉璃瓦以丹雘之將使
朝廷布金之至德與夫臣民樂輸之善緣永固莊嚴究
竟無漏潮公尊

君愛衆之心可謂誠且切矣猗歟盛哉予時

欽假江邨咫尺勝事夫焉得而無記或謂臣子効忠於國
家納民於軌物非二帝三王之道不敢垂於簡冊孰